

Mapabaxutoje San Pablo toyaquina Efeso tomarapijivijavabelia

*Pacuenia Pablo toyaquina mapabaxutoje Dioso
pejumecovénetsivi, Efeso tomarapijivijavabelia,
yabara pelivaisi*

¹ Xanë Pablönë, Dioso tanetojitsipaexae, nitapeta Jesucristo pijaapóstolenënexanë. Nexata Jesucristo nitoroba jivi pexanialivaisi tatsipae-baponaenexa. Pacatoyaquinatsi mapabaxutoje Dioso papijajivimë, Jesucristojavabelia panenajamatabëcuenecopatsivi, panejinavanapaevi Efeso tomarata. ² Pacatovajétatsi vaxa Diosojavabelia, vajatuxanenë Jesucristojavabelia ata, papecaitax-utotsoniataenexa jamatabëcuenexanepanaeya panejinavanapaenexa.

*Pacuenia Dioso jivi capanepaejitsia
pijaneconiveua Jesucristo pesivatëpaexaetsi yabara
pelivaisi*

³ “Pexaniacuene rabaja panetoexaname,” jaitsi vaxaitsi, vajatuxanenë Jesucristo paxa, Diosojavabelia. Jesucristo baja pijajivixaetsi, daxitacuenejavabelia Dioso nacayavenonapona vajanacajamatabëcuene asaëyaexanaenexa. Nexata Dioso nacajamatabëcuenexaniavaetapona vajanaponaenexa Dioso pijanacuayabetsia. ⁴ Dioso mapanacuaje pexanaevajënaeya ata, tajëvelia nacaitapeta pijajivinexatsi. Tsipaji

baja Dioso tajévelia yapétane Jesucristojavabelia vajanajamatabécuene copatsijavanexa Jesucristo vajanacasivatépaexae. Bajarapacuenia Dioso tajévelia nacaitapeta pijajivinexatsi vajajinavanapaenexa aneconijibia Dioso pitabarata. ⁵ Dioso bitso vajanacajitsipaexae, tajévelia najamatabécuenevereta pexicueniatsi vajanacataenexa. Jesucristo nacasivatépa Dioso petojitsipaecueniatsi. Bajaraxuata nexata Dioso nacatane pexicueniatsi. ⁶ Nexata Dioso pexaniacuenia vajanacaitaxutotsoniataexae, daxitamatocabi canacujitsia Diosojavabelia jumaitstsitsi tsabiabi. “Xanepana rabaja. Tsipaji pexaniacuene panetoexaname,” jaitsi tsabiabi Diosojavabelia. Dioso pexénato piasivanë pijajivixaetsi, Dioso nacaitaxutotsoniatane. ⁷ Pinijicuenia Dioso vajanacaitaxutotsoniataexae, nexata pexénato itorobicá mapanacuayabetsicaje vajanacasivatépaenexa. Bajarapacuenia Dioso nacavecuaajibiaexana pibisiacuene vajaexanaeneconimi. ⁸ Dioso pinijicuenia vajanacaitaxutotsoniataexae, nacayapétaeyaexana pexaniajailivaisi. Nacayapétaeyaexananua pacuene nacatoxanepana Dioso pejitsipaecuenia vajaexanavanapaenexa. ⁹ Xua Dioso tajévelia najamatabécuenevereta pexanaenexa, bajaraxua baja aeconoxae Dioso nacayapétaeyaexana. Bajaraxua picani abaxë itsajívi ata apo yapétae. Xua Dioso tajévelia najamatabécuenevereta pexanaenexa, maitsije. Dioso itorobijitsiatsica pexénato mapanacuayabetsicaje petoexanaeveretsinexatsi daxita pacuenia itoroba. ¹⁰ Pacuenia Dioso

tajëvelia najamatatabëcuenevereta, bajarapacuenia daxita Cristo pijajivitsi nacacaetuatsiana Dioso pecaëjëtsimatacabì itsa copiapatsiana. Dioso pecaëjëtsimatacabì itsa copiapatsiana daxitacuene mapanacuapijicueneje, athëbëpijicuene ata, Dioso baja tocopatsiana pexënato juya pevetsinexa.

¹¹ Jesucristo pijajivinexatsi tajëvelia Dioso nacaitapeta. Bajarapacuenia Dioso tajëvelia nacaitapeta tsipaji baja cajena Dioso tajëvelia najamatatabëcuenevereta bajarapacuenia pexanaenexa. Dioso daxitacuene exana pacuenia tsitaxanepanatsi. ¹² Bajarapacuenia Dioso tajëvelia nacaitapeta vajanajamatatabëcuene copatsinexa Jesucristojavabelia. Nexata vaxaitsi Dioso tojinavanapatsi Diosojavabelia vajajumaitsitsabinexa: “Diosomë, ayaijamatabëcuenenëmë bitso,” vajajaitsabiabinexa Diosojavabelia.

¹³ Pexaniajailvaisi papecacapanepaelivaisinexa, paxamë ata itsa pajumetaneme, nexata baja panajamatatabëcuene copatame Jesucristojavabelia papijajivinexamë. Nexata pacuenia Dioso tajëvelia najumecapanepaeya jumaitsi, pacarajuta baja Espíritu Santo papecatsijamatatabëecaenexa. Nexata bajarapacuenia panayapëtaneme Dioso papijajivicuenemë. ¹⁴ Espíritu Santo vajanacatsijamatatabëecaexae, yapëtanetsi pexaniajaicuene Dioso vajanacarajutsinexa matacabì apo peverevere caejava. Yapëtanetsinua Dioso vajanacacapanepaejavanaxa pexënato vajanacasivatëpaexae. Bajaraxuata vaxaitsi bejumaitstsí Diosojavabelia: “Diosomë, ayaijamatabëcuenenëmë bitso,” bejaitsi.

Pacuenia Pablo tovajëta Diosojavabelia Dioso pejumecovënëtsivi, Efeso tomarapijivi, yabara pelivaisi

¹⁵ Pacavënëlivaisitanetsi panenaja-matabëcuene copatsijava vajatuxanenë Jesucristo-javabelia. Pacavënëlivaisitanetsinua paneasivajava daxita pamonae Dioso pejumecovënëtsivi.
¹⁶ Bajaraxuata itsa vajëtajë Diosojavabelia, pacatovajëtababatsi. Nexata pexaniaja-matabëcuene rajutabibajë Diosojavabelia paxamë yabara. ¹⁷ Ayaijamatabëcuenenë Dioso, vajatuxanenë Jesucristo paxa. Bajaraponëjavabelia pacatovajëtababatsi. Pacatovajëtababatsi Espíritu Santo pejamatabëcuena xaniavaetsia panevajënaeyabelia papecayapëtaeyaexanaponanexa pacuenia Dioso jamatabëcueneitsi. Nexata Espíritu Santo pejamatabëcuena panevajënaeyabelia papecayapëtaeyaexanaponanexa pacuenia Dioso jamatabëcueneitsi. Pacayapëtaeyaexanaponanuanua pacuenia Dioso nacatsitanajamatabëcueneitajëta.
¹⁸ Pacatovajëtababatsinua Diosojavabelia Dioso papecajamatabëcueneitayotsinexa panevajënaeyabelia paneyapëtaeponaenexa pajamatabëcuene yabara Dioso pacajunata papijajivinemamë. Pacatovajëtababatsinua Diosojavabelia paneyapëtaenexa xua Dioso pacarajutsijitsia, bitso ayaijamatabëcuenejava, matacabi apo peverevererecaejava. Tajëvelia Dioso najumecapanepaeya jumaitsi Dioso pijajivitsi vajanacarajutsinexa matacabi apo peverevererecaejava. ¹⁹⁻²⁰ Pacatovajëtababatsinua paneyapëtaenexa Dioso bitso piasaënëcuene. Vajanacayavenonaenë

vajanajamatabëcueneopatsivi bajaraponëjavabelia. Dioso bitso piasaënëcuene jivi tsitanajamatabëcueneitajëta pamatacabí Cristo asaëyaexanatsi petëpaecujinae. Nexata baja Cristo paxa Dioso athëbëtatsia pemuxuneneta ecaeyaexanatsi pecujuanenia penajuaevetsinexabeje daxitacuene. Nexata bajarapasaëta vaxaitsi ata Dioso nacayavenonapona. ²¹ Bajarapacuenia Cristo athëbëtatsia, paxa Dioso pemuxuneneta, ecaeyaexanatsi pecujuanenia Cristo pevetsinexa daxitacuene. Nexata daxitanacuanëjava pevetsivi matatoxenetsia aeconoxae jane baja daxitacuene Cristo pepo pevetsinë. Cristo baja daxitacuene eveta mapamatacabitaje. Pejanamatocabijavabelianexa ata evetsiana. ²² Dioso tocopatatsi Cristo daxitacuene pevetsinexa. Nexata Cristo pepo pitorobinë daxita pamonae najamatabëcueneopata bajaraponëjavabelia. ²³ Daxita baja pamonae najamatabëcueneopata Jesucristojavabelia, Dioso tanetsi Cristo pijajivi. Cristo nexata itoroba bajarapamonae. Nexata Cristo bajarapamonae yajavaponapona daxita mapanacuajavaje.

2

Pacuenia Dioso pijajivi, piasivaxae, capanepae-jitsia yabara pelivaisi

¹ Dioso baja cajena pacajamatabëcueneitavayaexana Jesucristo pejamatabëcuenetia. Paxamë abaxë bajayata Dioso itsa apo pajumecovënëtsimë, naxuabiaya picani Diosovecua pajinavanapame pibisiacuene

paneexanavanapaeneconi yabara. Nexata pacuenia itsi petëpaevi, bajara picani pajamatabëcueneitsimë Diosojavabelia itsa abaxë Dioso apo pajumecovënëtsimë. ² Pacuenia Dioso apo pejumecovënëtsivi, pibisiacuene exanavanapa, bajara picani pacuenia paxamë ata bajayata pibisiacuene paexanavana-pame. Pajumecovënëtavanapame picani ëdovathi, ponë eveta pitaquirijamatabëcuene mapanacuataje. Aeconoxae dovathi jamatatabëcueneasaëyaexanapona pamonae Dioso apo pejumecovënëtsivi pibisiacuene pexanaenexa. ³ Daxita picani bajayata vaxaitsi pibisiacuene exanavanapatsi. Pacuenia vajajamatabëëthétota jitsipatsi vajaexanaenexa, exanabiabatsi. Xua najamatabëxainatsi, exanabiabatsi. Bajaraxuata pacuenia daxita itsamonaе naneconita Diosojavabelia, bajara picani pacuenia vaxaitsi ata naneconitatsi Diosojavabelia vajanacananeconisiaexanaenexa. ⁴ Itsiata baitsi jane Dioso, bitso jivi pitaxutotsoniataenë, vaxaitsi bitso nacajitsipa. ⁵ Diosovecua naxuabiaya picani vajajinavanapaevimi ata pibisiacuene vajaexanaeneconi yabara, itsiata Dioso nacajamatabëcueneaitavayaexana, Jesucristo Dioso itsa asaëyaexanatsi petëpaecujinae. Bajarapacuenia Dioso nacatoexana vajanacaitaxutotsoniataexae. Nexata Dioso nacacapanepaena pibisiacuene vajaexanaeneconimivecua. ⁶ Jesucristo petëpaecujinae, Dioso icatsia asaëyaexanatsi petëpaejavavecua. Nexata vaxaitsi Jesucristo-javabelia vajanajamatabëcueneycopatsixae, Dioso nacatane bevajanacayajavaasaëyaexanaevi. Dioso

nacatanenua Jesús athëbëtsia bevajanacaya-javaecaevi daxitacuene vajanacabarëevetsinexa.

⁷ Bajarapacuenia Dioso nacatoexana vajanacatsitanajamatabëcuene itajëtsinexa daxitamatocabijavabelianexa vajanacajitsipaecuene. Nacatsitanajamatabëcueneitajëtanua vajanacaitaxutotsoniataecuene Jesucristo vajanacasivatëpaexae. ⁸ Dioso cajena bitso pacajitsipa. Bajaraxuata Jesucristojavabelia itsa panajamatabëcuenecopatame, Dioso pacacapanepaena panijaneconivecua. Bajarapacuenia Dioso papecacapanepaejavanelia, panijacuata apo panatoexanaemë. Biji rajane Dioso pejamatabëcueneta pacacapanepaena. ⁹ Itsajivi ata Dioso petonacuenebaponaponaejamatabëcuene, Dioso apo capanepaetsi tsane. Biji rajane Jesucristojavabelia penajamatabëcuenecopatsixae, Dioso capanepaenatsi. Bajaraxuata itsajivi ata beayaijamatabëcuenejivi apo benatae Dioso pecapanepaejavanelia yapëtae ata. Apo bejumaitsinua: “Xanë Dioso tatonacuenebixae, nexata necapanepaena,” apo bejai. ¹⁰ Vaxaitsi raja Dioso nacaexana. Nacaexananua Jesucristo pijajivitsi Dioso vajatoexanavanapaenexa pexaniacuene. Bajarapacuenia Dioso tajëvelia najamatabëxaina vajatoexanavanapaenexa.

Pacuenia Dioso pejumecovënëtsivi ja-matabëcunexanepanaeya jinavanapa Jesucristo pejamatabëcueneta yabara pelivaisi

¹¹ Panajamatabënapire pacuenia picani paxamë bajayata pajamatabëcueneitsimë tsavanapae itsa abaxë Dioso apo pajumecovënëtsimë. Paxamë apo

pajudíovimë. Judíovi saicaya peperabëcaucubivitsi Dioso pijajivi penayapëtaenexa. Nexata judíovi jumai tsabiabi: "Vaxaitsi vajanacaperabëcaucubivi, Dioso pijajivitsi nayapëtanetsi," jai tsabiabi. Paxamë pijinia apo pajudíovixaemë, judíovi paxamë yabara jumai tsabiabi: "Bajarapamonae apo peperabëcaucubivitsi. Nexata Dioso apo pijajivi," jai tsabiabi judíovi paxamë yabara. ¹² Bajarapamatacabi abaxë apo pajumecovënëtsimë Cristo. Pasaicayavimë abaxë tsavanapae Diosovecua. Pasaicayavimë abaxë tsavanapae judíovi atavecua. Bajarapamatacabi abaxë apo payapëtaemë pacuenia Dioso pacayavenonaejitsia papecacapanepaenexa. Mapanacuata picani abaxë naxuabiaya Diosovecua pajinavanapame. "Pamatacabi têpaenajë, pepacuene naxuabianajë," pajamatabëjamë tsabiabi. ¹³ Paxamë picani Diosovecua bitso naxuabiaya pajinavanapame. Itsita baitsi jane aeconoxae baja Cristo papijajivimë. Cristo papecasivatëpaexae, aeconoxae baja payajavajinavanapame Dioso. ¹⁴ Paxanë pajudíovinë, paxamë apo pajudíovi atamë, Jesucristo pejamatabëcueneta daxitatsi Dioso nacajamatabëcuenexanepanaeyaexana namataenetsia vajanasivatsavanapaenexa. Jesucristo pejamatabëcueneta benacaemonaetsi Dioso nacaexana. Jesucristo daxitatsi vajanacasivatëpaexae, ajibi vajanayabaraitoyacuene vajanavecuanatsanaenexa. ¹⁵ Jesucristo cruzata itsa têpa, copiarucaeyaexana baja namataenetsia vajanaitoyacuenemi. Tsipaji baja Jesucristo itsa têpa, copiarucaeyaexana palivaisimi

bajayata Dioso Moiséspijinëta najumecopata. Bajarapalivaisimi paxanë pajudíovinë bitso picani asaëyata pajumecovënëtavanapajë. Nexata bajarapalivaisimi Jesucristo baja copiarucaeyaexana. Dioso Moiséspijinëta pena-jumecopatsilivaisi itsa pajumecovënëtavanapajë, paxamë apo pajudíovimë apo pacabarajamatabëcuexanepanaetsi. Aeconoxae baja Jesucristo vajajumecovënëtsixaes, Jesucristo pijajivitsi nacaexana. Nexata baja Jesucristo pejamatabëcuexaneta nacanabarajamatabëcuene xanepanaeyaexana. ¹⁶ Jesucristo cruzata vajanacasivatëpaexae, copiarucaeyaexana baja namataenetsia vajanaitojacuenemi. Nexata paxanë pajudíovinë, paxamë pijinia apo pajudíovi atamë, Cristo baja caubitsaëtotsi nacaexana pijajivinexatsi. Nexata baja Dioso jamatabëcuexanepanaeya nacatane.

¹⁷ Jesucristo patajopa mapanacuayabetsicaje. Nexata capatsica pexanialivaisi vajayapëtaenexa daxitatsi Dioso jamatabëcuexanepanaeya vajanacataejava. Paxamë apo pajudíovimë bitso picani Diosovecua naxuabiaya pajinavanapame. Bajaraxuata Dioso pacatocopata Jesucristo pelivaisi panejumecovënëtsinexa. Paxanë pajudíovinë pajumecovënëtajë picani palivaisi bajayata Dioso Moiséspijinëta najumecopata. Nexata paxanë ata Dioso panetocopata Jesucristo pelivaisi patajumecovënëtsinexa. ¹⁸ Nexata Jesucristo daxitatsi vajanacasivatëpaexae, paxanë pajudíovinë, paxamë pijinia apo pajudíovi atamë, vaxa Dioso nacatocopata vajajonenexa Dioso pijatomarabetsia.

Bajarapacuenia vaxa Dioso nacatocopata vajajonenexa pijatomarabetsia Espíritu Santo vajanacayavenonaexae. ¹⁹ Bajaraxuata apo pajudíovi atamë, aeconoxae baja Dioso panejumecovënëtsixae, bepasaicayavimë baja Dioso apo pacatae. Biji rajane itsamonaes, Dioso pejumecovënëtsivi yajava, paxamë baja Dioso papeximë pacaxana Dioso pijanacuatatsia panenajuajinavanapaenexa. ²⁰ Palivaisi bajayata Diosojumepaebivi profetavi tajëvelia yaquina, Jesucristo baja cajena pelivaisi, bajarapalivaisi pajumecovënëtame baja. Paxanë ata Jesucristo papijajivinë, paapóstolevinë, paneitoroba patacatsipaebaponaenexa bajarapalivaisi, Jesucristo pelivaisi. Nexata bajarapalivaisi panejumecovënëtsixae, panajamatabëcuene copabame baja Jesucristo javabelia papecacapanepaenexa. Bajaraxuata Dioso baja papeximë pacaxana. ²¹ Nexata baja itsamonaes ata ayaibitsaëto xaneto najamatabëcuene copabapona Jesucristo javabelia. Nexata Cristo pejamatabëcuena itorobaponatsi bajarapamonae. Daxita bajarapamonae Dioso baja pexi exanatsi. Nexata pacuenia Dioso tojitsipatsi, jinavanapa. ²² Bajara pijinia pacuenia paxamë ata, itsamonaes yajava, pamonaes Jesucristo javabelia penajamatabëcuene copabivi, caebitsaëto Dioso papeximë pacaxana. Nexata Dioso pacayajavaponapona Espíritu Santo papecatsijamatatabëecaexae.

3

Pacuenia Pablo itorobatsi pexanialivaisi,

Jesucristo pelivaisi, petsipaebaponaenexa apo judíovijava yabara pelivaisi

¹ Paxamë apo pajudíovi atamë, Dioso papijajivixaemë, pacatovajétabiabatsi Diosojavabelia. Xanë Pablonë, Jesucristo pijajivitonënë. Nexata Jesucristo pelivaisi jivi tsipaebabiabajë. Nexata Jesucristo pelivaisi jivi tatsipaebabiabixae, nenaneconitsiaexaneta penaneconitsivi pejebabiabibota. Jesucristo pelivaisi jivi tatsipaebabiabijavata, jumaitsinë tsabiabi: "Pamonae apo judíovi ata, itsa jumecovënëta Jesucristo pelivaisi, bajarapamonae ata Dioso pijajivi," janë tsabiabi paxamë yabara. Bajarapacuenia Jesucristo pelivaisi jivi tatsipaebabiabixae, penaneconitsivi pejebabiabibota tavëna judíovi neeta. ² Bepayapëtaneme xanë Dioso taneitorobicuene patacatsipaebinexa apo pajudíovi atamë Dioso papecaitaxutotsoniataejava. ³ Apo pajudíovi atamë, Dioso papecaitaxutotsoniataejava tayapëtaenexa, Dioso baja cajena neyapëtaeyalexana. Dioso papecaitaxutotsoniataexae papecacapanepaejavnexa ata tayapëtaenexa, Dioso baja cajena neyapëtaeyalexana. Nexata Dioso papecaitaxutotsoniataejava paneyapëtaenexa, pacatoyaquinarutetatsi caelivaisiyobeje saya. ⁴ Itsa palebianame, payapëtaename pacuenia Dioso neyapëtaeyalexana épajudíovinë Dioso apo patanitaxutotsoniataejava. Payapëtaenamenua pacuenia Dioso neyapëtaeyalexana, apo pajudíovi atamë, Dioso papecaitaxutotsoniataejava. ⁵ Bajayata abaxë itsajivijavabelia ata Dioso apo yapëtaeyalexanae, apo pajudíovi atamë, Dioso pa-

pecaitaxutsoniataejavanexa. Aeconoxae baja paxanë Dioso papijajivinë, paapóstolevinë, Dioso paneyapétaeyaexana, apo pajudíovi atamë, Dioso papecaitaxutsoniataejava. Profetavijavabelia ata Dioso yapétaeyaexana, apo pajudíovi atamë, Dioso papecaitaxutsoniataejava. Aeconoxae baja bajarapacuene Dioso paneyapétaeyaexana Espíritu Santo pejamatabëcueneta. ⁶ Xua picani itsajivijavabelia ata Dioso apo yapétaeyaexanae, bajaraxua maitsije. Paxanë pajudíovinë, itsa pajumecovënëtajë pexanialivaisi, Jesucristo pelivaisi, panecapanepaena Dioso. Bajara pijinia pacuenia paxamë ata, apo pajudíovi atamë, itsa pajumecovënëtame pexanialivaisi, Jesucristo pelivaisi, pacacapanepaena Dioso. Pajudíovinë, apo pajudíovi atamë, daxitatsi benacaemonaetsi nataenatsi. Jesucristo pelivaisi vajajumecovënëtsixae, daxitatsi Dioso nacarajutsiana xua Dioso najumecapanepaeya nacarajutsiapaeba.

⁷ Piasaënë Dioso taneitaxutsoniataexae, netocopata Jesucristo pelivaisi tatsipaebaponanexa daxitajivijava. Dioso necaëjëpaeyaexananua xaniavaetsia jivi tatsipaebaponanexa bajara-palivaisi. ⁸ Xanë itsiata bevelajamatabëcuenenënë nataniji daxita Dioso pejumecovënëtsivivecua. Itsiata baitsi jane mapapexaniacueneje Dioso netocopata. Dioso netocopata apo pajudíovimëjava patacatsipaebaponanexa pexanialivaisi, Jesucristo pelivaisi. Nexata pacatsipaebaponatsi ayaicuenia Jesucristo vajanacayavenonaponaejavанexa. ⁹ Dioso nitoroba patacatsipaebaponanexa, apo pajudíovi

atamë, Dioso papecacapanepaejavexa. Dioso daxitacuene pexanaenë mapanacuataje. Dioso cajena tajëvelia najamatatabëxaina paxamë ata, apo pajudíovi atamë, papecacapanepaenexa. Itsata itsajivijavabelia ata Dioso apo yapëtaeyaxanae, apo pajudíovi atamë, Dioso papecacapanepaejavexa. ¹⁰ Bajarapacuenia Dioso pacacapanepaena, apo pajudíovi atamë, petsitanajamatatabëcuene itajëtsinexa athëbëtatsia pevetsivijavabelia. Nexata athëbëtatsia pevetsivi itsa nacataena daxitatsi Dioso vajajumecovënëtsivi, pajudíovinë, apo pajudíovi atamë, benacaemonaetsi vajanajuajinavanapaejava, athëbëtatsia pevetsivi yapëtaena bitso Dioso peyapëtaenëcuene daxitacuene pexanaenexa. ¹¹ Pacuenia Dioso tajëvelia copiaya najamatatabëxaina, mapanacua pexanaevajënaeya ataje, bajarapacuenia baja Dioso exanaevereta. Tcipaji baja Dioso itorobicá vajatuxanenë Jesucristo vajanacasivatëpaenexa cruzata. ¹² Vaxaitsi baja najamatatabëcuene copatatsi Jesucristojavabelia vajanacacapanepaenexa. Bajaraxuata Diosojavabelia vajëtabiabatsi ajumejunavijibia. ¹³ Bajaraxuata Diosojavabelia asaëyata pacatovajëtabiabatsi patanesiva-jamatatabëcuene cueranaeyanivamë abaxë nanéconitsia taponaponaejava penaneconitsivi pejebabiabibota. Jesucristo pelivaisi jivi tatsipaebijavata, jumaitsinë tsabiabi: “Pamonaë apo judíovi ata itsa jumecovënëta Jesucristo pelivaisi, bajarapamonaë ata Dioso pijajivi,” janë tsabiabi paxamë yabara. Bajarapacuenia Jesucristo pelivaisi jivi tatsipaebabiabixae,

penaneconitsivi pejebabiabibota tavëna judíovi nenaneconitsiaexaneta. Bajaraxuata panesivajamatabëcuenebarëyamëre naneconitsia taponaponaejava penaneconitsivi pejebabiabibota.

Pacuenia Pablo Diosojavabelia tovajëta Dioso pejumecovënëtsivi yabara pelivaisi

¹⁴ Itsa najamatabënapitabiabajë, apo pajudíovi atamë, Dioso papecacapanepaejavnexa, nexata tamatabacabëta nucabiabajë asaëyata patacatovajëtsinexa vajatuxanenë Jesucristo paxa Diosojavabelia. ¹⁵ Daxita Dioso pijajivi, pamonae athëbëtatsia jinavanapa, pamonae ata mapanacuataje jinavanapa, daxita bajarapamonae Dioso tanetsi benacaemonae. Caenë paxa exana Dioso. ¹⁶ Dioso baja cajena bitso piasaënë. Ayajamatabëcuene pexainaenë. Bajaraxuata pacatovajëtabiabatsi Diosojavabelia Dioso pesaëta papecajamatabëcuene asaëyaexanaenexa Espíritu Santo pejamatabëcueneta. ¹⁷ Pacatovajëtabiabatsinua Jesucristo papecatsijamatabëecaenexa panesivanajamatabëcopatsixae bajara-ponëjavabelia. Pacatovajëtabiabatsinua bitso paneasivanexa itsamonae ata, pamonae Dioso pejumecovënëtsivi. ¹⁸ Pacatovajëtabiabatsinua daxita Dioso panejumecovënëtsivi panjamatabëcuneyapëtaenexa Jesucristo bitso papecaaasivajava. ¹⁹ Pacatovajëtabiabatsinua panijacuata xaniavaetsia paneyapëtaenexa Jesucristo vajanacaasivajava. Jesucristo vajanacaasivajava, bitso pexaniacuene,

apo vajayapëtaecapanepaejava xaniavaetsia vajayapëtaenexa. Nexata itsa payapëtaename Jesucristo vajanacaasivajava, paxainaename pajamatabëcuene Dioso pacatojitsipa.

20 “Diosomë, bitso ayaijamatabëcuenenëmë,” jaitsi vaxaitsi Diosojavabelia. Bajarapacuenia jumaitsitsi tsipaji bitso Dioso pecaëjëpaenëtsi vajanacayavenonaenexa. Dioso caëjëpatsi vajanacatoexanaenexa vajavajëtsicuenia. Vajanajamatabëxainaejava ata matatoxenetsia, Dioso caëjëpatsi vajanacatoexanaenexa. Dioso pesaëta nacayavenonabiaba. **21** Dioso pejume-covënëtsivi Dioso peyavenonaponaexaetsi, itsamonaejavabelia tsipaebavanapa Dioso bitso ayaijamatabëcuene pexainaenëcuene. Jesucristo ata itsa ponapona mapanacuataje, nexata Dioso tsitanajamatabëcueneitajéta jivijavabelia Dioso bitso ayaijamatabëcuene pexainaenëcuene. Bajaraxuata daxitajivi bejumai tsabiabi Diosojavabelia: “¡Diosomë, bitso ayaijamatabëcuenenëmél!” bejai tsabiabi Diosojavabelia daxitamatocabijavabelianexa. Bajara itsi tsane.

4

*Pacuenia Espíritu Santo pejamatabëcuena
daxita Dioso pejumecovënëtsivi naja-
matabëcuenejëpaeya jinavanapaena yabara pelivaisi*

1 Naneconitsiaponaponajë majotaje, penaneconitsivi pejebabiabibota, tajume-covënëtsixae vajatuxanenë Jesucristo

taneitorobicuenia. Asaëyata pacamuxu-
 jiobatsi panejinavanapaenexa pacuenia
 Dioso pacatojitsipa Dioso papecajunatsivi
 papijajivinexamë. ² Itsamonaevectua
 beveliajamatabëcuenevi nataeya pajinavanapare.
 Panajamatabëxainarenua pexaniajamatabëcuene
 daxitajivjavabelia. Pajamatabëcuenesaëmërenua
 tsavanapae bajayajebi, itsamonaes pacait-
 sacueniababiabi ata. Namataenetsianua
 panayavenonabiabare namataenetsia panena-
 sivaxae. ³ Pajamatabëcuenesaëmëre tsavanapae
 najamatabëcuenejëpaeya panejinavanapaenexa.
 Bajaraxua yabara Diosojavabelia panato-
 vajëtabiabare papecayavenonaenexa Espíritu
 Santo. Nexata nabarajamatabëcuenexanepanaeya
 pajinavanapaename. ⁴ Jesucristojavabelia
 vajanajamatabëcuenecopatsixae, vaxaitsi baja
 nexata caenë Jesucristo pijajivitsi. Xainatsi
 baja caeEspíritu Santo Dioso vajanacajunatsivi.
 Bajaraxuata caejamatabëcuene xainavanapatsi.
 Evetavanapatsi pacuenia Dioso najumeca-
 panepaeya jumaitsi vajanacacapanepaenexa.
⁵ Caenë rabaja vajatuxanenë Jesucristo.
 Daxitatsi najamatabëcuenecopatatsi caenëjavabelia.
 Nacabautisabanua caenë Jesucristo pevënëta.
⁶ Xainatsi caenë vaxa Dioso. Caenë Dioso
 daxitatsi vajanacanamatacaitorobinë.
 Dioso pijajivitsi, daxitatsi, nacayavenona.
 Nacayajavaponaponanua.

⁷ Caejivitsi canacujitsia, Cristo pejitsipaecuenia
 nacajamatabëcuene caëjëpaeyaexanapona
 pecovëta vajatonacuenebavanapaenexa
 vajanacaitorobicuenia. ⁸ Tcipaji baja cajena

Dioso pejumelivaisibaxutota tajëvelia jumaitsi Jesucristo yabara mapacueniae:

Ayaubitsaëtoxaneto pitoyavitsi pepuaja-matabëcueneamoneyabi, athëbëabetsia naviatsiania. Pijajivi pijinia pepuajamatabëcueneacaëjëpaeyaexanae pecaëjëpaejamatabëcuenetsi pecovëta pet-onacuenebavanapaenexatsi, naviatsiania, jai tajëvelia Dioso pejumelivaisibaxutota Jesucristo yabara.

⁹ Bajarapacuenia Dioso pejumelivaisibaxutota Jesús yabara tajëvelia jumaitsi. Tsipaji Jesús patsijitsiatsica mapanacuayabetsicaje. Bajaraxuacujinae icatsia Jesús naviatsijitsia athëbëabetsia. Mapanacuaje bevelianacua saya Dioso pijanacuavecua. ¹⁰ Ponë yabara Dioso pejumelivaisibaxutota bajarapacuenia tajëvelia jumaitsi, patsica baja mapanacuayabetsicaje. Bajaraxuacujinae icatsia bajaraponë naviatsia baja tajënacuayabetsia. Bajaraxuacujinae Jesucristo itorobica Espíritu Santo. Nexata daxitanacuanëjava Espíritu Santo yajavapon-aponia daxita Dioso pejumecovënëtsivi. ¹¹ Nexata Dioso pejumecovënëtsivi, caejivi canacujitsia, Espíritu Santo jamatabëcune caëjëpaeyaexanaponatsi saicayacuenia. Itsamonaes Espíritu Santo jamatabëcueneacaëjëpaeyaexanatsi apóstolevinexa Jesucristo pexanaejavanë pevajunupaebaponaenexa. Itsamonaes pijinia Espíritu Santo jamatabëcuenecaëjëpaeyaexanatsi peyapëtaenexa pajamatatabëcuenelivaisi xaina Dioso pejumelivaisi. Nexata tsipaeba itsamonaejavelia. Itsamonaes pijinia

Espíritu Santo jamatabëcuñecaëjëpaeyaexanatsi
 petsipaebaponaenexa apo peyapëtaevi abaxë pex-
 anialivaisi, Jesucristo pelivaisi. Itsamonaë pijinia
 Espíritu Santo jamatabëcuñecaëjëpaeyaexanatsi
 pevetsinexa Dioso pejumecovënëtsivi.
 Jamatabëcuene caëjëpaeyaexanatsinua xani-
 niavaetsia peyapëtaeyaxanaenexa Dioso
 pijacuene. ¹² Bajarapacuenia Espíritu
 Santo, daxita Dioso pejumecovënëtsivi,
 jamatabëcuñecaëjëpaeyaexanatsi petonacueneba-
 vanapaenexa Dioso pijacuene. Nexata daxita
 Dioso pejumecovënëtsivi, caejivi canacujitsia,
 ajamatabëcuñesä tsaponae pevajënaeyabelia.
¹³ Nexata belia daxitatsi bajarapacuenia
 najamatabëcuñejëpaeya jumecovënëtsianatsi
 Dioso. Jamatabëcuñeyapëtaenatsinua xaniavaetsia
 vajatuxanenë Jesucristo, Dioso pexënato. Nexata
 daxitatsi Espíritu Santo nacajamatabëcuene
 caëjëpaeyaexanaena Dioso vajajumecovënëtsinexa.
 Nacajamatabëcuene caëjëpaeyaexanaenanua
 xaniavaetsia Dioso vajatojinavanapaenexa.
 Nexata pacuenia Jesucristo jamatabëcuñeitsi,
 bajara vaxaitsi ata jamatabëcuñeitsitsi tsane.
 Nexata jinavanapaenatsi pacuenia Dioso
 nacatojitsipa. ¹⁴ Nexata pacuenia pejevaxi
 caejamatabëcuene apo najamatabëxainaë,
 bajara vaxaitsi apo jamatabëcuñeitsitsi tsane.
 Itsajamatabëcuene apo vecuanajamatabëxainaëtsi
 tsane, palivaisi baja jumecovënëtavanapatsi.
 Nexata itsamonaë penajumetsënëtsilivaisi
 beplexaniajailivaisicuenia nacatsipaebi ata
 tsane vajanacayamaxëitojorobinexa picani, itsiata
 apo nacayamaxëitojorobi tsane. ¹⁵ Nexata

itsamonaejavabelia itsa tsipaebaponatsi pexaniajailivaisi, bajarapamonae asivaya betanetsi. Pacuenia Cristo vajanacaitorobinë jamatabëcueneitsi, bajara vaxaitsi ata vajajamatatabëcueneitsinexa, benatojitsipatsi Cristo vajajamatatabëcuenejëpaenexa. ¹⁶ Daxitatsi Cristo pelivaisi vajajumecovënëtsivi, caenë Cristo pijajivitsi. Vajaperabëtota caevitoyo canacujitsia exanapona pacuenia Dioso tocopatatsi. Bajara pijinia pacuenia vaxaitsi ata, caejivitsi canacujitsia, Cristo nacatocopatapona vajatonacuenebavanapaenexa pacuenia nacatojitsipa. Nexata namataenetsia nayavenonaeya natonacuenebianatsi. Namataenetsianua nasivatsi tsavanapae tsane. Bajarapacuenia nexata jamatabëcuenevitsabaponaenatsi Dioso vajajumecovënëtsijava.

Pacuenia Cristo pijajivi pejanajamatatabëcuene xaina yabara pelivaisi

¹⁷ Jesucristo taneitorobixae, mapacuenia pacajumaitisijitsiatsije. Pëtsa baja pajinavanapame pacuenia jinavanapa Dioso apo peyapëtaevi. Dioso apo pejumecovënëtsivi najamatatabëxainavanapa pexanaenexa piamatamobicuene Diosojavabelia. ¹⁸ Dioso apo pejumecovënëtsivi ajamatatabëcueneitaquiri tsavanapae. Tsipaji apo yapëtae Dioso. Bitsosaya ajamatatabëcuenetaja. Bajaraxuata Dioso pejitsipaecuenia apo tojinavanapae. Diosovecua naxuabiaya jinavanapa. ¹⁹ Nexata apo yapëtae piauracuene. Casaë bitsosaya pexanaenexa daxita xua pibisiacuene. ²⁰ Itsiata baitsi jane paxamë

itsa pajumecovënëtame Jesucristo pelivaisi, apo pacaitorobi pibisiacuene paneexanaenexa.

²¹ Pajumetaneme baja cajena Jesucristo pelivaisi. Jesucristo pelivaisi panejumecovënëtsixae, nexata Jesucristo pijajivi pacatsipaeba pexaniajailivaisi pacuenia copiaya Jesucristo tsipaebatsi. ²² Nexata pacopabare panijaperujumatabëcuene. Bajarapajamatabëcuene bajayata abaxë Dioso itsa apo pajumecovënëtsimë, pacaitorobabiaba pibisiacuene paneexanaenexa. Panijaperujumatabëcuene cajena bitso abeje. Bajarapajamatabëcuene picani pacayamaxëitojorobabiaba panejitsipaecuenia pibisiacuene paneexanaenexa. ²³ Paxamë Diosojavabelia panajamatabëcuene pënëyorore. Papejanajamatabëcuene vimë panaexanare. ²⁴ Pacuenia Dioso jamatabëcuene itsi, bajara paxamë ata pajamatabëcuene itsimëre. Nexata jivi xaniavaetsia patsitajinavanapaename pacuenia Dioso pacatojitsipa.

²⁵ Bajaraxuata pëtsa baja panajumetsënëtame. Pacaenëmë canacujitsia namataenetsia panatsipaebare pexaniajailivaisi. Tsipaji daxitatsi caenë Jesucristo pijajivitsi.

²⁶ Itsa panabaraanaepaname, pëtsa pibisiacuene panaexaname panenabaraanaepanaejavata. Pëtsa panasivajamatabëcuene sitecame itsamatacabijavabelia ata. ²⁷ Tsipaji itsa panasivajamatabëcuene tsitecae jitsipame, nexata dovathi pacayamaxëitojorobijitsipa. Nexata pibisiacuene paexanaejitsipame.

²⁸ Pajivi penacobetoxotsijivi, copatsi baja pe-

nacobetoxotabiabijava. Nacuenebi pepitsinexa xua namatavenona, peyavenonaenexanua bepejiobivijavabelia.

²⁹ Pëtsa pacuaicuajamë pibisialivaisi. Biji rajane pacuaicuajamëre pexanialivaisi. Pexanialivaisi itsa pacuaicuajamë tsane, nexata papecajumetaevi pajamatatabëcuenyavenonaename. Tsipaji paepatota jamatabëcuenefafaena, itsa pacajumetaena, pacamuxunaajamatabëcuenesaë tsane. ³⁰ Pëtsa itsacuene paexaname Espíritu Santo papecatojitsipaecuenavecua panejamatabëcuenebejiobitsiyaniwa Espíritu Santo. Dioso pijajiviciuenemë. Nexata Dioso pacacapanepaena pamatacabì Dioso pijajivi capanepaena mapanacuavecuaje.

³¹ Daxita pibisiajamatabëcuene pacopabare. Pacopabarenua baja, itsajivi itsa pacaitsacueniaba, bajayajebi panejamatabëtsitecabiabijava. Pëtsa bajayajebi pajamatatabëtsitecame paneanaepanaejava. Bepijia pajamatatabëcaevare. Pacopabarenua baja paneajamatabëcuenebejejava ata. Pacopabarenua baja panenabaraanaepanabiabijava ata. Pacopabarenua baja itsamonaë pibisiacuenia panebijataeyabiabijava ata. Pacopabarenua baja itsamonaë pibisiacuenia panebaracuaicuajaitسابيابيabijava ata. ³² Biji rajane pexaniajamatabëcuene paxainare. Namataenetsia panaitaxutobejiobiataema. Pacuenia Jesucristo pejamatabëcuenetë Dioso pacabarajamatabëcunexanepana pibisiacuenia paneexanaevi ata, bajara pijinia pacuenia

paxamë ata panabarajamatabëcuenexanepanare,
paxamëyajuvënëvi pacaitsacueniabi ata.

5

Pacuenia Dioso pexi bejinavanapa yabara pelivaisi

¹ Paxamë Dioso papeximë. Pacuenia
Dioso jamatabëcueneitsi, bajara paxamë
ata pajamatabëcueneitsimëre tsavanapae.

² Pacuenia bitso Cristo nacaasiva, bajara
pijinia pacuenia paxamë ata bitso pasivamërë
tsavanapae itsamonae ata. Bajayata judíovi
Diosojavabelia pijaneconi itsa xaina, oveja pebito
beyaxuababiaba. Nexata judíovi ofrendacuenia
ovejavi rajutabiaba Diosojavabelia pijaneconi
Dioso pevecuaajibiaexanaenexatsi. Bajara
pijinia pacuenia Cristo bitso vajanacaasivaxae,
nacopata pebeyaxuabinexatsi vaxaitsi
vijaneconi vajanacavecuaajibiaexanaenexa.
Bajarapacuenia Cristo bitso vajanacaasivaxae,
itsa nacopata vajanacasivatëpaenexa, nexata paxa
Dioso bitsosivajamatabëcuenabarëyatsi.

³ Paxamë rabaja Dioso papijajivimë.
Bajaraxuata pëtsa baja paexaname
daxita xua pibisiacuene. Pëtsa pan-
jamatabëxainamenua pibisiacuene pane-
exanaenexa panevitota. Pëtsa panaja-
matabëxainamenua bitso panenaxainaeyabine
daxitacuene mapanacuapijicueneje. ⁴ Pëtsa
panabarëcuaicuajamënu piauracuene yabara
ata. Pëtsa panabarëcuaicuajamënu saya
jema natsiquejemalivaisixi ata. Tsipaji apo
pexanepanaecuene. Biji rajane Diosojavabelia

pexaniajamatabëcuene parajutabiabianame.
⁵ Payapëtaneme rabaja pexaniajaicuene mapalivaisije. Pajivi daxita pibisiacuene exana, apo jone tsane Dioso pijanacuayabetsia. Ponë jaita itsava pijavavecua, pova pijinia jaita itsanë pamonavecua, apo jone tsane Dioso pijanacuayabetsia. Pamonae ata bitso jitsipa pexainaenexa daxitacuene mapanacuapijicueneje, apo jone tsane Dioso pijanacuayabetsia. Pamonae bitso jitsipa pexainaenexa daxitacuene mapanacuapijicueneje, jamatabëcuenejëpa pamonaе vajëcabiaba jumapecataeya pexanaenëanëjavabelia. Bajarapamonaе jamatabëcuenejëpa tsipaji bitso jitsipa saicayacuene Diosovecua. ⁶ Pëtsa pacayamaxëitojoroba itsajivi ata paxamë ata paneexanaenexa bajarapitsipibisiacuene. Tsipaji Dioso ayaicuenia naneconitsiaexanaena pamonaе Dioso apo pejumecovënëtsivi, bajarapitsipibisiacuene pexanaevi. ⁷ Bajaraxuata pëtsa payajavajinavanapame pibisiacuene pexanaevi.

⁸ Paxamë picani bajayata pajamatabëcueneitaquirimë tsavanapae itsa abaxë apo payapëtaemë pexanialivaisi, Jesucristo pelivaisi. Itsiata baitsi jane aeconoxae baja Jesucristojavabelia panenajamatabëcopatsixae, Dioso baja pacajamatabëcueneitayota. Bajaraxuata pajinavanapare Dioso pejitsipaecuenia, pacuenia Dioso pijajivi jinavanapa. ⁹ Dioso baja papecajamatabëcueneitayotsixae pexanialivaisita, paexanavanapare ëpexaniacuene. Pacanaëjëtaponarenua ëpexaniajaicuene paneyapëtaenexa, xani-

avaetsia panejinavanapaenexa Dioso
 pejitsipaecuenia. ¹⁰ Panevajënaeyabelia
 pacanaëjëtaponare paneyapëtaenexa xua yabara
 Dioso pacasivajamatabëcuene barëyajitsia.
 Nexata itsa payapëtaename xua yabara
 Dioso pacasivajamatabëcuene barëyajitsia,
 bajaraxua tsiteca asaëyata panevajënaeyabelia
 paexanavanapaename. ¹¹ Dioso apo pejume-
 covënëtsivi pibisiacuene itsa exanavanapa,
 pëtsa panaexaname bajarapapibisiacuene.
 Biji rajane paitavetsianame bajarapamonae
 pibisiacuene pexanaeyaniva Dioso pitabarata.
¹² Xua bajarapamonae exana muetsia, bajaraxua
 bitso pibisiacuene. Nexata itsajivi itsa
 cuenetaejitsipatsi bajaraxua pexanaejava,
 bajarapajivi bitso ajumeura tsipae juya
 petsipaebinexa itsamonaejavabelia. Tsipaji bitso
 pibisiacuene xua muetsia exana bajarapamonae.
¹³ Itsiata baitsi jane bajarapamonae itsa
 paitavetsianame Dioso pejumelivaisita,
 nacueneyapëtaena bajarapamonae bitso
 pibisiacuene pexanaejava. ¹⁴ Bajaraxuata pina
 bajarapamonae yabara, itsamonaes Dioso pijajivi
 jumaitsi mapacueniae:
 Jamatejema saya pajinavanapame, pibisiacuene
 paexanavanapae atamë. Bajaraxuata
 Diosovecua naxuabiaya pajinavanapame.
 Pacopabare baja pitaquirijamatatabëcuene.
 Nexata Cristo pejamatabëcuene pani-
 janeconivecua Dioso pacacapanepaena.
 Pacajamatatabëcueneitayotsiana,
 jai pina itsamonaes Dioso pijajivi.
¹⁵ Nexata baja xania tsane. Panayajivitaema

pibisiacuene xaniavaetsia panejinavanapaenexa. Pëtsa pajinavanapame pacuenia bajinavanapa Dioso apo peyapëtaevi. Biji rajane pajinavanapare pacuenia bajinavanapa bitso peyapëtaevi Dioso pijacuene. ¹⁶ Dioso papecaitorobicuenia xaniavaetsia patojinavanapare daxitamatacabijavelianexa. Pamuxujiobiabare itsamonae ata Cristo pelivaisi pejumecovënëtsinexa. Tsipaji mapanacuapijivije, Dioso apo pejumecovënëtsivi, épibisiacuene exanavanapa. ¹⁷ Pëtsa pajinavanapame pacuenia Dioso apo peyapëtaevi jinavanapa. Pacaasaëmère tsavanapae Dioso panejumecovënëtsijava, pacuenia Dioso pacatojisipa paneexanavanapaenexa. ¹⁸ Pëtsa paitajibimë tsabiabi. Tsipaji bajarapacuene Diosovecua pacanaxuabiaexanaejitsipa infiernojavabelia. Biji rajane panacopatabiabare Espíritu Santo papecatsijamatatabëvënëcaenexa, Espíritu Santo papecaitorobicuenia paneexanabiabinexa. ¹⁹ Namataenetsia panatsipaebabiabare vajatuxanenë ayajamatatabëcuene pexainaecuene. Bajarapacuenia namataenetsia itsa panatsipaebabiabianame, daxita panejamatabëéthëtovetsina panaxëanabiabianame pavajanë rubena Salmosbaxutota. Panaxëanabiabianamenua himnobaxutota ata pavajanë rubena. Panaxëanabiabianamenua pavaji ata Espíritu Santo jemata pacanaxëanaeyaexanaena. ²⁰ Pajumaitsimë tsabiabi tsane Diosojavabelia: “Xanepana rabaja. Tsipaji bitso pexaniacuene panetoxaname,” pajamë tsabiabi tsane daxitacuene yabara vaxa Diosojavabelia vajatuxanenë Jesucristo pevënëta. Bajarapacuenia Diosojavabelia pajumaitsimë

tsabiabi tsane pexanepanaecuene yabara, apo pexanepanaecuene ata yabara.

Pacuenia muxujibatsi penapitsijivibeje yabara pelivaisi

21 Padaxitamë namataenetsia panajamatabëcueneevere, xua jamatabëpanaitorobame, namataenetsia panenaitorobabiabinexa Cristo panejumecovënëtsivixae.

22 Paxamë papetiriavimë, pacuenia yaiyataeya pajumecovënëtabiabame vajatuxanenë Jesucristo papecaitorobicuenia, bajara pijinia pacuenia yaiyataeya pajumecovënëtabiabare paneamonajivi ata. **23** Pacuenia Cristo Dioso tocopatatsi daxita vaxaitsi Dioso vajajumecovënëtsivi vajanacaitorobinexa, bajara pijinia pacuenia pebi Dioso tocopatatsi pijava pitorobinexa. Cristo nacopata pebeyaxuabinexatsi vajanacacapanepaenexa daxita vaxaitsi vajanajamatabëcueneocopatsivi Cristojavabelia. Daxitatsi caenë Cristo pijajivitsi. **24** Nexata bejumecovënëtavanapatsi pacuenia nacaitorobapona Cristo. Bajara pijinia pacuenia paxamë ata, papetiriavimë, bepajumecovënëtavanapame daxita pacuenia pacaitoroba paneamonajivi.

25 Paxamë pijinia papebijivimë, pasivamëre panijavajivi. Bepaasivamë panivajivi pacuenia daxitatsi Cristo nacaasiva daxita Dioso vajajumecovënëtsivi. Vajanacaasivaxae, Cristo nacopata pebeyaxuabinexatsi vajanacacapanepaenexa vajaneconivecua. **26** Bajarapacuenia Cristo exana caenë Cristo

pijajivitsi vajanacaexanaenexa. Nexata baja
 Cristo vajanacaajamatabëcuene xuirajibiaexanae-
 java, najamatabëcueneitajétatsi vajanacabauti-
 sabijavata. Vajajumecovénëtavanapaexae
 Dioso pejumelivaisi, nacaajamatabëcuene
 xuirajibiaexanapona. ²⁷ Bajarapacuenia
 Cristo exana daxita Dioso vajajumecovénëtsivi
 itsamatacabí vajanubenaenexa Cristo
 pitabarata. Nexata itsamatacabí nubenaenatsi
 Cristo pitabarata vajaaneconijibivi, Dioso
 vajanacajamatabëcuenexaniavaetsivi. ²⁸ Nexata
 pebijivi bitso biasiva pijavajivi. Pacuenia
 pijacuata naperabëasiva, bajarapacuenia biasiva
 pijavajivi. Nexata ponë asiva pijava, bajaraponë
 asiva pijava pacuenia pijacuata naperabëasiva.
²⁹ Itsajivi ata apo naperabëitoya. Biji rajane
 xaniavaetsia naperabëeveta. Bajara pijinia
 pacuenia Cristo ata nacaeveta daxita Dioso
 vajajumecovénëtsivi. ³⁰ Tsipaji vaxaitsi Cristo
 pijajivitsi, ayaubitsaëto atatsi, becae�ivitsi Dioso
 nacatane. ³¹ Nexata nayapëtane pexaniajaicuene
 mapacuenaje. Pebi petiriva itsa pita pijavanexa,
 naexanabeje becae�ivi peperabëtocuenia.
 Tsipaji Dioso pejumelivaisibaxutota jumaitsi
 mapacueniae: “Pebi itsa nacojoba,
 paxavecua, pena atavecua, bavecuanatsata
 pijavajavabelia. Nexata anijajivimibeje
 becae�ivicuenia naexanabeje,” jai Dioso
 pejumelivaisibaxutota. ³² Mapalivaisije bitso
 ayapëbeje vajajumeyapëtaenexa. Itsiata baitsi
 jane comparacióncuenia nacayapëtaeyaexana.
 Cristo vajanacaasivaxae, vaxaitsi Cristo pijajivitsi
 Dioso nacatane becaenë Cristo peperabëtotsi.

33 Bajarapalivaisi comparacióncuenia pacayapëtaeyaexana nexata paxamë, pacauenëmë canacujitsia, paneasivanexa panijavajivi. Nexata panijavajivi pasivamëre. Pacuenia panijacuata panaperabëasivamë, bajara pijinia pacuenia panijavajivi pasivamëre. Panijavajivi ata pijinia bepacayaiyatane.

6

1 Paxamë papeximë, Dioso panejumecovënëtsivixae, pajumecovënëtabiabare paneaxajivi, paneenajivi ata. Bajarapacuenia panijamonae pajumecovënëtabiabare. Tsipaji bajarapacuenia Dioso pacatocopata panejumecovënëtabiabinexa panijamonae.
2-3 Dioso pejumelivaisibaxutota jumaitsi mapacueniaje: “Yaiyataema axa. Yaiyataema ena ata nejamatabëcuenebarëyanexa, neponaponaenexanua bajayajebi mapanacuataje,” jai Dioso pejumelivaisibaxutota. Bajarapalivaisi Dioso itsa najumecopata jivi pejumecovënëtsinexa, yajavanajumecopata pacuenia Dioso yavenonaejitsia pajivi jumecovënëta bajarapalivaisi. Itsalivaisianë copiaya Dioso najumecopatsi ata, apo yajavanajumecopatsi pacuenia yavenonaejitsia pajivi jumecovënëta bajarapalivaisianë. Nexata matapania mapalivaisitaje Dioso yajavanajumecopata pacuenia yavenonaejitsia pajivi jumecovënëta bajarapalivaisi.

4 Paxamë panexi panexainaevi, anaeyacuenia pëtsa panexi paitorobabiabame papecabaraanaepanaeyaniva. Biji rajane

xaniavaetsia panacoxivitsare papecajumecovënëtabiabinexa paneitorobijava. Pacujarubarenua Dioso pejumelivaisi pejumecovënëtsinexa.

⁵ Paxamë pijinia itsamonae papijajivimë, dajubicuenia papecacanajetsivi, itsamonae amoneya panetonacuenebavanapaenexa. Patoexanabiabare pacuenia panijatuxanevi pacaitoroba. Payaiyataema panijatuxanevi. Cujunaviaya panijatuxanevi patonacuenebabibabare asaëyata. Pacuenia Cristo panejitsipaexae, xaniavaetsia patonacuenebabibame Cristo pijacuene, bajara pijinia pacuenia xaniavaetsia panijatuxanevi patonacuenebabibabare.

⁶ Xaniavaetsia panijatuxanevi patonacuenebabibabare daxitamatocabi canacujitsia pacuenia patonacuenebijitsipame Cristo. Pëtsa matapania itsajota pacanaitaxutocaeveta panijatuxanevi, asaëyata patonacuenebame papecasivabarëyanexa panetonacuenebijava yabara. Patoexanabiabare panijatuxanevi pacuenia Dioso pacatojitsipa panetoexanaenexa daxita panejamatabëëthëtovetsina.

⁷ Jamatabëcuenebarëyaya patonacuenebavana pare panijatuxanevi. Xua panijatuxanevi patonacuenebavanapame, bajaraxua yabara pasivajamatabëjumaitsimëre: “Maxuaje nacuenebajë apo étajatuxanenënexa. Taniji pepo tajatuxanenë, Cristo, betatonacuenebijava,” pasivajamatabëjamëre panijatuxanevi panetonacuenebijava yabara. ⁸ Payapëtaneme rabaja mapacueneje. Pajivi pexaniacuene toexana itsamonae ata, bajarapajivi matamotsianatsi

Dioso. Pamonae ata dajubicuenia canajetatsi itsamona amoneya petonacuenebabinexa, bajarapamonae ata Dioso matamotsianatsi pexaniacuene itsa toexana itsamona ata. Pamonae ata apo pecanajetsivitsi, bajara pijinia pacuenia bajarapamonae ata Dioso matamotsianatsi pexaniacuene itsa toexana itsamona ata.

9 Paxamë pijinia papijatuxanevimë, pacamuxujobatsi mapacueniaje. Xaniavaetsia pataema panijajivi, papecatonacuenebivi. Pëtsa anaeya patiobabiabame panijajivi asaëya papecatonacuenebabinexa. Pacanaëjëre pacuenia paxamë ata panijatuxanenë Dioso eca athëbëtatsta. Pamonae ata apo pecanaia. Bajaraponëjavabelia pananeconitsipame. Bajaraponë panijajivi ata pijatuxanenë baja cajena. Bajaraponë saya najëpaeya nacatane daxitatsi. Nexata paneconivajëto xainatsi caejivitsi canacujitsia, bajarapanecanivajëtota nacananeconitsiaexanaponaena. Bajaraxuata panijajivi ata itorobajë xaniavaetsia papecatonacuenebabinexa.

Pacuenia Dioso pejumecovënëtsivi itorobatsi penayajivitaenexa dovathi yabara pelivaisi

10 Tajamonae, icatsia cotocaevi patacatoy-aquinaelivaisita, pacajumaitsitsi mapacueniaje. Pajamatabëcuenesaëmëre tsavanapae vajatuxanenë pesaë paneyajavajinavanapaexae. **11** Vajabitsaënë banayajivinaxatata piatajajava pijavajabitsaënë pejorojoronaeyanivatsi. Bajara

pijinia pacuenia paxamë ata panayajivina-jamatabëcuenexatare Dioso pejumelivaisita. Nexata bajarapacuenia pajamatabëcuenesaëmë tsane dovathi papecajamatabëcuene yamaxëitojorobiyaniva.

12 Tsipaji Dioso vajanacatojitsipaecuenia itsa exanavanapatsi, nexata dovathi jamatabënacaitSacueniaba. Nexata bëpënëa vajajamatatabëcuenesaëta asaëyata vajabitsaë bexanatsi, dovathi pijajivijavabelia, apo vajataevijavabelia. Dovathi cajena pijajivi ayaubitsaëtoxaneto. Dovathi pijajivi xaina penamatacaitorobivitsi, bitso piajamatatabëcuenesaëvi. Nexata dovathi pijajivi jinavanapa athëbtatsia. Jinavanapa mapanacuata ataje. Nexata dovathi pijajivi itoroba daxitajivi pibisiacuene pexanaeyaexanaenexatsi mapanacuataje. Bajaraxuata bëpënëa vajajamatatabëcuenesaëta, asaëyata vajabitsaë bexanatsi dovathi pijajivijavabelia. **13** Nexata paxamë dovathi papecajamatabëcuene yamaxëitojorobiyaniva, panayajivinajamatabëcuenexatare Dioso pejumelivaisita. Nexata pamatacabí pibisiacuene pacatocapiapatsiana dovathi pejamatabëcueneta papecajamatabëcueneëjëtsinexa, itsiata pajamatatabëcuenesaëmë tsane bajarapalivaisita. Nexata pibisiacuene apo paexanaemë tsane. **14** Vajabitsaënë itsa nayajivinaxatata piatajajava, caecovëta banuca. Nexata pijavajabitsaë apo tixitsitsi pecovëvecua. Bajara pijinia pacuenia paxamë ata pajamatabëcuenesaëmëre Dioso pejumelivaisita dovathi papecajopaeyaexanaeyaniva Dioso pejumelivaisi

panejumecovënëtsijavavecua. Vajabitsaënë piatajajava itsa nayajivinaxatata, bayanaepacëta penaepacëtsijavata pesarabiyaniivatsi penayajivinaxatatsijava. Bajara pijinia pacuenia paxamë ata Dioso pejumelivaisita, pexaniajailivaisita, panayajivinajamatabëcuenexatare. Vajabitsaënë piatajajava banamëpabëxatata pijavajabitsaënë pejorojoronaeyanivatsi. Bajara pijinia pacuenia paxamë ata Dioso pejumelivaisita panayajivinajamatabëcuenexatare. Pajamatabënajinavanapare Dioso baja aneconijibia papecataejava. Nexata dovathi nayajivitaeya pajinavanapare papecajamatabëcuene yamaxëitojorobiyaniiva.

15 Vajabitsaënë najamatabëcueneveretsiaya pexaniazapato banataxuxatata pijavajabitsaëjavabelia jamatejema peponaenexa. Bajara pijinia pacuenia paxamë ata panajamatabëcueneverere, jamatejema pexanialivaisi jivi panetsipaebavanapaenexa. Daxita baja pamonae jumecovënëta bajarapalivaisi, Dioso baja barajamatabëcuenexanepanaeya tanetsi.

16 Panajamatabëcuene copare Diosojavabelia papecayavenonabiabinexa. Vajabitsaënë banayajivicapona escudovënëjava, pijavajabitsaënë itsa bixabajarabatsi piipiitarunutsipuyaeneta, penacaranatsinexa bajarapaescudota, penayajiviitacaëbinexua. Bajara pijinia pacuenia paxamë ata dovathivecua Dioso pacajamatabëcuenecaranatsiana, itsa panajamatabëcuenecopatsianame Diosojavabelia papecayavenonabiabinexa. **17** Vajabitsaënë banamataxatata piatajajava, cascovënëjava, pematathinaxuabiyaniivatsi pijavajabitsaënë.

Bajara pijinia pacuenia paxamë ata panayajiv-inajamatatabëcuñexatare Dioso pejumelivaisita. Pajumecovënëre papecacapanepaelivaisinexa panijaneconivecua. Vajabitsaëñe itsa pona pijavajabitsaëjavabelia, banayajivicapona espada. Bajara pijinia pacuenia paxamë ata panayajiv-icaponare Dioso pejumelivaisi, palivaisi baja pacayapëtaeyaexana Espíritu Santo. ¹⁸ Dioso pejumelivaisita najamatatabëcuñexatatsiaya itsa pajinavanapaename, nexata pacuenia Espíritu Santo pacaitoroba, daxitamatamacabi canacujitsia Diosojavabelia pavajëtabiabianame Dioso papecajamatatabëcuene yavenonabiabinexa. Pajamatatabëcuñenitatsacamëre tsavanapae dovathi papecajamatatabëcuene yamaxëitojorobiyaniva. Nexata pacopatsinejevamë Diosojavabelia panevajëtabibjava, ajamatatabëcuñenitatsacaya Diosojavabelia panayajivivajëtababare. Asaëyata patovajëtababarenua daxita Dioso pejume-covënëtsivi. ¹⁹ Xanë ata panetovajëtababarenua Dioso taneyapëtaeyaexanaenexa paepatota bajarapalivaisi tsipaebajë itsamonaejavabelia. Panetovajëtababarenua ajumeurajibia tatsipaebabiabinexa apo judíovi ata Dioso pecapanepaejavánexatsi. ²⁰ Naneconitsiaponaponajë majotaje, penaneconitsivi pejebabiabibota, itsamonaejavabelia tatsipaebabiabixae bajarapapexanialivaisi, Dioso tanetocopatsilivaisi. Bajaraxuata Diosojavabelia panetovajëtababare, naneconitsiaponaponae atanë, ajumeurajibia jivijavabelia tatsipaebabiabinexa bajarapalivaisi pacuenia jamatabëtsipaebajë.

Pacuenia Pablo toyaquina Efeso tomarapijivi peveretsinexa baja petoyaquinaelivaisi mapabaxutotaje yabara pelivaisi

²¹ Vajabananë Tíquico itsa patsiana paxamëjavabelia, pacatsipaebiana daxita pacuenia netane. Bajaraponë bitso vajaasivanë. Xaniavaetsia paneyavenonabiaba itsa patonacuenebabajë pacuene vajatuxanenë paneitoroba.

²² Bajaraxuata Tíquico pacatoitorobatsi baja paxamëjavabelia papecatsipaebinexa pacuenia pajinavanapajë. Nexata Tíquico itsa pacatsipaebiana pacuenia pajinavanapajë, pamuxunaajamatabëcuenesaëmë tsane.

²³ Pacatovajëtabiabatsi vaxa Diosojavelia, vajatuxanenë Jesucristojavelia ata, jamatabëcuenexanepanaeya panejina-

vanapaenexa. Pacatovajëtabiabatsinua namataenetsia panenasivanexa Diosojavelia panenajamatabëcuenecopatsivixae.

²⁴ Pacatovajëtabiabatsinua Diosojavelia daxita paxamë Dioso papecayavenonabiabinexa. Paxamë abaxë tsiteca bitso pasivamë tsavanapae vajatuxanenë Jesucristo. Bajara itsi tsane.

Dios pejumelivaisibaxuto pejanalivaisibaxuto New Testament in Guahibo

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guahibo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022
bc03f416-faf8-5000-bfb5-5ca8a3fa98cf